



PRIMEIRU  
MINISTRU

**DISKURSU  
SUA EXELÊNCIA PRIMEIRU-MINISTRU  
KAY RALA XANANA GUSMÃO  
IHA OKAZIAUN APREZENTASAUN PROPOSTA LEI  
ORSAMENTU BA 2015**

Parlamentu Nasional, Díli  
1 Dezembru 2014



Palácio do Governo,  
Avenida Presidente Nicolau Lobato,  
Dili, Timor-Leste

Sua Exelênsia  
Señor Presidente Parlamentu Nasional  
Suas Exelênsias  
Vise-Prezidentes Parlamentu Nasional  
Suas Exelênsias  
Señoras no Señores Deputadus

Karus kolegas, membrus Governu

Señoras no señores,

Priviléjiu boot ida mai ha'u bele mai, dala ida tan, iha Uma Demokrasia ida ne'e atu apresenta ba Vosa Exelênsia Señor Presidente Parlamentu Nasional no distintus Deputadus sira hotu Orsamentu Jeral Estadu ba 2015.

Atu kumpri objetivus Estadu, ne'ebé konsagra iha Konstituisaun Repúblika, Governu kontinua haka'as an atu transforma Timor-Leste ba paiz ho rendimentus médius-altus ho populasaun ne'ebé moris di'ak, isin di'ak no matenek. Planu Estratéjiku Dezenvolvimentu ho Programa Governu hatudu dalan ne'ebé prezisa liu hodi konkretiza objetivus hirak ne'e.

Orsamentu ne'ebé mai apresenta ohin iha ne'e estebelese dotasoens nesesárias hodi finansia políticas ne'ebé ho objetivu atu dezenvolve Timor-Leste, ho pasus seguros. Políticas hirak ne'e transversais no integradas no formula sein nunca haluha dezafius ka sasadik ne'ebé inerentes ba ita-nia joven nasaun, ita-nia povu nia nesesidades ho obstáculos ka sasatan ne'ebé hasoru iha faze atual iha ita-nia dezenvolvimentu ne'e.

Dezenvolvimentu, señoras no señores, ne'ebé ita alkansa iha tinan sanulu-resin rua independênsia laran, sei la bele halo karik la iha esforsu kolektivu no primordial husi Estadu timorense iha konsolidasaun ezersísiu demokrátiku no karik la iha aliseres metin ne'ebé ita harii ho paz no estabilidade ne'ebé ita rasik sente no moris iha comunidades hotu-hotu iha paiz ne'e.

Ho liafuan badak, uluk hanesan mos ho ohin, dezafius ne'ebé mosu iha ita-nia paiz tenke hasoru ho forma konsensual no ho esforsu hamutuk atu bele hakat liu. Debates demokrátikus, partisipasaun husi instituisoens Estadu no Sociedade Sivil hodi buka hamutuk solusoens, ka, ho liafuan seluk, sentidu kona-ba Estadu no sentidu kona-ba sidadania, hanesan fatores fundamentais ba transformasaun ne'ebé ita hakarak ba Timor-Leste.

Governu, iha nia kompetênsia ezekutiva, hanoin katak dalan ba transformasaun ne'e – sai husi pobreza ba verdadeiru kresimentu Timor-Leste nian – tenke inkluziva, ekilibrada no sustentável.

Nune'e, wainhira konsidera Orsamentu Jeral Estadu ba 2015 ita labele haluha objetivus fundamentais haat:

Primeiru, política fiskal tenke sustentável ba médiu no longu prazu.

Segundu, kresimentu ekonómiku sustentável tenke koerente no benefisia sidadauns timoroan hotu-hotu, husi áreas urbanas ba áreas rurais.

Terseiru, ita tenke investe iha infra-estruturas ho qualidade, no rekursus umanus kualifikadus, ne'ebé sustenta kresimentu ekonómiku, prestasaun servिस no dezvoltimentu setores produtivos Nasaun nian tomak.

Kuartu, tenke proteje timoroan hotu-hotu liu-liu sira ne'ebé prezisa no merese liu, sira ne'ebé nein sempre bele hetan direktamente benefísius husi kresimentu ekonómiku.

Tanba razoens hirak ne'e, mak, dala ida tan, atu apresenta Orsamentu Jeral Estadu 2015 nian, ita halo ho laran-metin katak OJE ida ne'e hanesan solusaun ida ba vontades barabarak ne'ebé halo Timor-Leste sai Nasaun ne'ebé reziliente, ho aktu responsabilidade ne'ebé jenuína no demokrasia.

Tanba razaun ne'e, mak jestaun reseitas petróleu nian no utilizaun Fundu Petrolíferu ezije responsabilidade no transparênsia. Nu-entantu, ezije mos aten-barani no neon matenek, tanba rekursus hirak ne'e wainhira investe sei permite fó continuidade ba prosesu konstrusaun Nasaun no ba dezvoltimentu umanu iha ita-nia paíz.

Investimentu ne'ebe prudente husi rekursus ne'e, ho responsabilidade no transparênsia, mak bele halo sai ba realidade ita-nia mehi hamutuk atu ita-nia labarik sira bele eskola no hán di'ak, ita-nia jovens sira isin-di'ak, kualifikadus no hetan empregu, ita-nia ferik no katuas sira bele hela iha fatin ne'ebé di'ak no hetan tratamentu di'ak, depoisde sakrifísius ne'ebé sira oferese ba Pátria ida ne'e.

Tanba ne'e, señoras no señores, jestaun ho protesaun ba ita-nia rekursus naturais ne'e kestaun ida ne'ebé relaciona ho timoroan tomak, ne'e kestaun kona-ba dignidade ho soberania nasional!

Exelênsias,

Ita atu tama iha tinan 2015, maibe ita labele haluha atu refleto kona-ba akontesimentu iha tinan 2014 laran, iha nível nasional no internasional, ne'ebé ita labele sees husi nia impaktu ba desizoens ne'ebé Estadu Timor foti.

Ita hotu hatenen katak kontextu internasional oras ne'e konturbadu ka iha konfuzoan laran. Timor-Leste dook uitoan husi sentrus poder globais atu bele observa buat ne'ebé akontese iha mundu, maibé la ho kondisionalizmus polítikus ou ekonómikus.

Ita haree katak konpromisu internasional kona-ba dezvoltimentu no demokrasia, países hirak ne'ebé dezvoltividus liuhotu iha mundu mak dita ka determina. Sira mak impoen sira-nia padroens ne'ebé ema labele viola no universais, dala barak la respeita nein uitoan sirkunstânsias ho adversidades ka difikuldades ne'ebé países ne'ebé jovens liu, países ne'ebé kiak liu, no países ne'ebé moris iha situaun aat liu tanba funu no permanente konflitu, hasoru no sente.

Labele haluha katak ema besik 2,2 mil milloens iha mundu ne'e mak moris iha situasaun kiak rabat-rai, frajilidade no konflitu!

Labele haluha katak iha nasoens hirak ne'e sei la konsege konkretiza nein úniku Objektivu ida husi Dezenvolvimentu Miléniu to'o 2015!

Labele haluha mos katak oras ne'e funu mosu kuaze iha mundu tomak, maski ladún boot. Iha ne'e ha'u hanoin kona-ba pezadelu, katak mehi aat tebetebes, ne'ebé ema sira hasoru iha Irake, Afeganistaun, iha Líbia, iha Síria, iha Ukrânia, iha Israel no iha Palestina, iha Sudaun Sul no iha Repúblika Sentru Afrikana! Loos duni, iha mundu globalizadu ohin-loron nian, ne'ebé asesu ba koñesimentu ho arte diplomasia mak hanesan instrumentus importantes husi sékulu XXI, ita moris ho laran ta'uk, ho deskonfiansa no la sente seguru kona-ba umanidade nia futuru.

Sentrus boot hirak ne'ebé foti desizaun, sira la hatene ou lakohi hatene kona-ba kauzas reais ba problemas umanidade nian, mak hanesan ekskluziun, halo ema sai kiak, marjinalizasaun ba grupus no buka rezolve konflitu sosial ho funu, ne'ebé gasta osan trilioens dólares, hodi benefisia sira ne'ebé fabrika ka halo, kilat no benefisia mos sira-nia paízes rasik.

Ita mos labele haluha katak ameasas ambientais kontinua aumenta, hodi tau iha kauza aspirasoens lejítimas dezenvolvimentu nian, ha'u bele dehan subsistênsia, paízes balu nian! Paízes ne'ebé dezenvolidus liuhotu iha mundu globalizadu promete los de'it mak planus asaun, ne'ebé kuaze nunka konkretiza – ha'u hetan oportunidade atu akompaña debates iha última Assembleia-Jeral Nasoens Unidas, ida ne'ebé hanaran 'Simeira kona-ba Mudansas Klimáticas' no ha'u fiar katak ita hotu akompaña deklarasoens ne'ebé halo ho laran tomak kona-ba asuntu ne'ebé hanesan, iha Simeira G-20, iha Brisbane, iha fulan foin liubá.

Ita hotu haree, señoras no señores, katak dezigualdade aumenta iha mundu globalizadu tanba rikusoin konsentra iha ema lubun oan ida sira-nia liman; tanba interesses ekonómikus, ganânsia ho korrupsaun mak liufali sentidu umanidade. La'ós buat foun katak iha Uniaun Europeia tomak, korrupsaun atinji \$120 mil milloens euros kada tinan. Iha Simeira G-20, iha Brisbane, líderes mundiais sira deklara funu hasoru evazaun ka la selu taxas no brankeamentu kapital ne'ebé, tinan-tinan, kalkula serkade \$1.3 triloens euros iha Europa no \$1.7 triliões dólares iha Estados Unidus América. Banku América rasik hatudu, iha fulan hira liubá, fraude, ka na'ok osan serkade \$16 mil milloens dólares, montante ne'ebé hanesan ho ita-nia Fundu Petróleu.

Ha'u mos hetan ona oportunidade atu denuncia iha fora internasionais oiain no, inkluzive, iha Assembleia-Jeral ONU, forma injusta ne'ebé Assembleia ida ne'e ekipara tan fali Timor-Leste paíz ki'ik-oan ida iha Pasífiku, la haluha mos paízes iha África no mezmua iha Ásia, ho paízes ne'ebé dezenvolidus liuhotu husi G-7, América no Europa nian, ho Japaun, Austrália no Xina.

Tuir ha'u haree, padroens hirak ne'e sira impoen ho forma inkonsistente, irrealista no la tama iha kontextu realidades rasik husi paízes no, konsekuentemente, sira-nia instituisoens Estadu. Aliás, ba sosiedades ne'ebé dezenvolidas liuhotu, permite justifika kualker tipu violasaun direitus umanus ho liafuan falsu "seguransa interna" sira-nia paízes rasik nian. Enkuantu ba demokrasias ne'ebé sei nurak no sei iha faze

konsolidasaun, defeza ba sira-nia intereses nasionais,ba sira-nia soberania,konsidera fali hanesan violasaun ba Estadu Direitu!

Maibé paízes ki'ik sira mos iha direitu atu reaje hasoru agresoun ba sira-nia Estadu no ba sira-nia populasoun nia Direitus!

Wainhira hetan irregularidades ne'ebe labele simu no hahalok hanesan violasaun klara ba direitu internasional durante negosiasoens kona-ba Tratadu Tasi Timor, ne'ebé prevê atu ita fahe malu petróleu "off-shore", entre ita-nia paíz ho ita-nia viziña Austrália, Timor-Leste propoen, iha final 2012, meza konversasoens hodi rezolve diferendus no injustisa ne'ebé halo ba Timor-Leste. Proposta ne'e Canberra la simu, la fó nein alternativa seluk ida ba Governu Timor senaun lori kazu ne'e ba Tribunal Arbitrajen Haia, hodi fó liután vantajen boot ba Austrália einvezde intereses povu martirizadu timornian kona-ba rikusoin ne'ebé pertense ba rai ida ne'e.

Tanba Canberra insiste, mak ita konkorda atu suspende ba fulan 6, kazu Arbitrajen iha Haia, no agora ita dezenvolve hela kontaktus ho objetivu sentral defende Timor-Leste ho nia povu nia lejítimus intereses.

Nune'e mos atuasaun husi multinasionais petróleu ne'ebe buka hadau tomak rekursus naturais povu timor nian, selu impostu menus liu ida ne'ebé sira obrigadu selu no halo dedusoens ilísitas, hodi nune'e obriga foti prosesus sanulu-resin iha tribunais, tanba dala ida tan ne'e trata kona-ba oinsá tenke fó-hikas fali ba timoroan sira, buat ne'ebé sira-nia direitu.

Timor-Leste determinadu atu halo manán nia vontade polítika kolektiva, bazeia iha valores demokrátikus ne'ebé ita-hotu partilla no konsagra iha Konstituisaun República. Señor as no señoras, tanba razaun ida ne'e mak ita-nia Povu tomak oferese ninia sakrifísus! Ita la luta – la térus no la mate – tan de'it atu iha ita-nia bandeira rasik, maibé liu-liu atu ezerse no uzufrui ka goza buat ne'ebé hanesan ita-nia direitu!

Ita-nia soberania implika mos konsolidasaun ba autonomia ho funsionamentu ne'ebé eficiente, profisional ho responsável husi Instituisoens Estadu tomak la iha exepasaun. Aliás, soberania tenke sai hanesan sentru atuasaun órgãos Estadu hotu-hotu nian, ne'ebé selu sira-nia servidores atu bele defende intereses Nasaun ho intereses povu nian, ho sentidu ne'ebé onestu kona-ba Estadu.

Karik órgauns hirak ne'e ida mak debilitadu ka fraku, mákina Estadu tomak sei sente afetada no ezije asaun imediata hodi proteje bein komun. Tanba ne'e mak imperativu garante katak wainhira haree hetan frajilidades iha funsionamentu Estadu, ita hotu tenke atua ba nia fortalesimentu, uza interdependênsia poderes. No dever ne'e kompete ba órgauns soberania.

Karik ema barak mak la kompreende ida ne'e no la hatene kona-ba valores soberania aas liuhotu e'ebé ita tenke defende. Ema barak mos la kompreende dezafius ne'ebé paíz joven ida hanesan ita-nian ne'e hasoru ne'ebé ita harii husi nada ka zero, ou menusde nada.

Partikularidades ita-nia Nasaun nian, sakrifísus ita-nia Povu nian, futuro ita-nia Paíz nian, ezije dala-barak atu hola pozisaun ne'ebé rigoroza maski "ema bele la

kompreende” iha eskala demokrasias ne’ebé dehan katak modernas no sekulares. Tau hela iha kauza prinsípius no rekursus ne’ebé halo parte ita-nia realidade, ita-nia kultura no ita-nia identidade, ne’ebé halo parte ita-nia luta ne’ebé halo ho laran tomak, ba Independênsia no Soberania.

Buat ne’ebé ema dehan katak arrogânsia, ba ita timoroan, ne’e hanesan de’it rekoñesimentu kona-ba nesesidade boot atu korriji buat ne’ebé la serve ba ita no reforma buat ne’ebé la proteje intereses superiores Nasaun!

Exelênsias  
Señoras no Señores,

La nega katak iha tinan hira ne’e laran ita hetan dunik melloria boot no barak iha povu tomak Timor-Leste nia moris.

Hamutuk ho reformas ne’ebé lori paz no estabilidade ba paíz, Governu halo mos reforma ba jestaun Estadu no sistema finanseiru ho iha implementasaun polítikas ekonómikas ne’ebé rezulta taxas kresimentu ekonómiku aas tebetebes.

Entre 2007 no 2011 ita hetan kresimentu PIB naun petrolíferu 12,5% kada tinan durante período ne’e tomak. Iha 2012, kresimentu PIB naun-petrolíferu tuun ba 7,8% no subliña katak kresimentu ne’e la’ós tanba despezas husi Estadu, ne’ebé hatudu primeira etapa tranzisaun ba kresimentu ekonómiku ho qualidade ne’ebé di’ak liu, sustentável ho baixa inflasaun, ne’e liu-liu tanba setor privadu mak halo.

Ita labele haluha iha ne’e atu halo komparasaun ho países seluk, tanba Timor-Leste iha dezempeñu ne’ebé di’ak tuir padroens internasionais, liu-liu bainhira kompara ho ekonomias emerjentes iha rejiaun aziátika. Ita-nia estimativa mak entre 2013 ho 2015 kresimentu ekonómiku sei situa entre 5,6% no 7,1%. Tendênsia kresimentu ida ne’e konsistente ho ita-nia aposta iha sustentabilidade despezas governamentais no iha inflasaun, ne’ebé la liu alvu ne’ebé estabesele iha ita-nia Planu Estratéjiku hanesan 4 to’o 6%.

Estratéjia Governu nian, dezde 2007, katak kompete liu ba setor privadu atu dudu ba oin ekonomia rai ne’e nian. Iha tinan hira ne’e laran ita repete katak iha faze inicial ne’e prezisa Estadu mak fomenta uluk lai kresimentu liuhusi despeza pública, tanba setor privadu sei fraku hela no seidauk prontu atu simu papel boot nu’udar motor ekonomia.

Agora tanba kria ona kondisoens, mak iha ona fatin ba período foun ida iha istória Timor-Leste nian, ne’ebé prevê katak tenke setor privadu, la’ós Estadu, mak lori kresimentu ekonómiku ne’e ba oin, hodi hatuur metin paíz ne’e iha nível rejional no mos global.

Taxa ás investmentu nian ne’ebé prevê husi parte setor privadu, bazeia ba propostas sólidas kona-ba investmentu empresas multinasionais, hanesan prova ida husi susesu polítikas governamentais sira uluk nian.

Ohin-loron sei la iha empresas produsaun boot ne’ebé la interesadas atu investe iha Timor-Leste karik Governu la investe uluk, hanesan, iha projetu alargamentu no

rekuperasaun rede nasional estradas, iha projetu Tasi Mane no investimentu integradu iha kosta sul, iha konstrusaun portus, hanesan iha Tibar no iha Suai, hadi'a instalasoens aeroportus nian, no sertamente karik la hadi'a jersaun, transmisaun no distribuisaun eletrisidade.

Tuir estudu ida ne'ebé foin daudaun halo husi konsultora PricewaterhouseCoopers, hamutuk ho Banku Mundial, Timor-Leste hanesan paiz ne'ebé kompetitivu liuhotu haree husi karga fiskal entre Estados membrus CPLP no, iha ranking 189 paizes nian ne'ebé analiza, ita tama iha kinkuajésima kinta pozisaun. Defaktu, ita-nia estratéjia atu dada investimentu estranjeiru, esensial ba diversifikasaun ekonómika, halo ita sai hanesan paiz ne'ebé kompetitivu no atrativu ba kriasaun negósus.

Akordu ne'ebé foin halo kona-ba Investimentu ho empreza Heineken Asia Pacific Pte. Ltd., ne'ebé envolve maisde 40 milloens dólares, hanesan ezemplu ida husi buat ne'ebé ha'u refere ba.

No hanesan bele verifika mos iha Relatóriu Doing Business 2015, husi Banku Mundial, Timor-Leste sai hanesan, "ekonomia ne'ebé progride liu iha simplifikasaun kona-ba kriasaun empreza foun ida, liuhusi konsepsaun balkaun úniku". Nune'e ita bele dehan katak ita-nia servisu produz daudaun rezultadus ne'ebé ita hakarak no SERVE – one stop shop, balkaun úniku hanesan prova ida husi ne'e.

Ambiente favorável ne'ebé ita kria hodi harii negósus iha paiz ne'e, hamutuk ho investimentus iha konstrusaun infra-estruturas,esensiais ba kriasaun empregu, diminuisaun dependênsia ba setor petrolíferu no afirmasaun Timor-Leste hanesan paiz ida ne'ebé la'o ona tuir dalan modernidade no progresu.

Iha mos âmbito estratéjia ida ne'e nian mak ita kria iha tinan ida ne'e Ajênsia Especializada kona-ba Investimentu, hanaran "Investe Timor-Leste",no nia objetivu prinsipal mak atu promove investimentu privadu ho exportasoens iha paiz.Operacionalizasaun ajênsia ne'e nian no implementasaun polítikas ba aumentu produsaun agríkola, industrial no servisus, sertamente sei katapulta ka dudu sa'e aas dezvoltamentu ekonómiku, sosial no umanu iha paiz.

Fundamental ba dezvoltamentu integradu paiz ne'e nian, no atu diminui asimetrias ka diferensas dezvoltamentu entre kapital ho distritus,mak elaborasaun polítikas, hanesan dezentralizasaun, hodi promove distribuisaun rekursus ne'ebé justa liu ho kriasaun kondisoens edekuidas ba povu tomak nia moris. Programas hanesan PDID ho PNDIS mak sai hanesan ezemplus husi sira-nia implementasaun prátika no liuhusi hirak ne'e mak ita konsege mos hadi'a asesu ba bee, ba saneamentu, ba saúde, ba edukasaun no kultura no ba formasaun lideransas lokais, fundamentais ba dezvoltamentu ne'ebé inkluzivu.

No tanba ita fiar ba ita-nia paiz nia potencial, mak ho barani ita avansa ba projetu boot kona-ba dezvoltamentu rejiu Administrativa Especial Oecusse Ambeno, projetu ne'eb'e lidera husi Sua Exelênsia Dr. Mari Alkatiri, no kriasaun Zona Especial Economia Sosial Merkadu,ne'ebé nia enkuadramentu legal prepara tiha ona no ninia operacionalizasaun mos hahú ona. Iha 2015 ho transferênsia serkade **9,9 milloens ba**

dezenvolvimentu konseptual programa ZEESM, sei bele hahú implementa planu dezenvolvimentu rejiaun ne'e nian.

Ha'u hanoin, aliás, katak hala'o hela preparativus ba organizasaun selebrasoens ba tinan 500 wainhira portugezes sira tama iha Oecusse. Selebrasoens hanesan ne'e sei konta ho prezensa altus dignitarius internasionais no sei sai hanesan impulsu boot ba dezenvolvimentu rejiaun ne'e nian.

Nune'e mos evolusaun inisiativa kona-ba dezenvolvimentu triangular integradu husi Estados tolu iha ita-nia sub-rejiaun - Timor-Leste, Territóriu Norte Austrália no Províncias Indonézia nian balu – konfirma dezenvolvimentu ne'ebé promisor husi setores importantes balu hanesan turizmu, enerjia, egrikultura, investigasaun no Dezenvolvimentu, hodi garante tan reforsu ba lasus kulturais, sosiais no amizade ho ita-nia viziñus ne'ebé besik liu. Prevê ona iha 2015, atu investe **1 millaun dólares** atu fó continuidade ba programa ne'e.

Ita bele orgulla mos tanba melloria iha indikadores sosiais tanba ezekusaun polítikas no programas Governu nian, tanba planus setoriais, tanba projetus sosiedade sivil no parseirus dezenvolvimentu. Ita hotu hamutuk servisu ba dezenvolvimentu paíz.

Ita bele nota lailais faktus hirak ne'e liuhusi konsulta rejistus matrículas eskolares, malnutrisaun infantil, mortalidade infantil, uzu eletrisidade no konsumu famílias nian.

Persentajen labarik sira ne'ebé frekuenta eskola iha Timor-Leste aumenta maka'as, husi 66% iha 2007 ba 92% iha 2013.

Iha momentu ida ne'e, ita iha maisde 3.300 bolsas ne'ebé fó ona, tanba maioria benefisiarius halo hela estudus formasoens iha Timor-Leste. Instituisoens ne'ebé hetan número bolseirus boot liu mak ministérius saúde, edukasaun, UNTL no INAP. Ita fiar katak investimentu ida ne'e sei proporsiona iha tempu badak retornu ba Estadu, tanba rekursus umanus kualifikadus no aptus ba merkadu traballu ne'ebé ezijente no kompetitivu ne'e absolutamente vitais iha âmbito ita-nia estratégia dezenvolvimentu paíz nian.

Aprovasaun iha tinan ne'e ba kurríkulu nasional ho baze iha primeiru no segundu siklus ensinu báziku, ba kurríkulu nasional ho baze iha edukasaun pré-eskolar no referensial ba polítikas kona-ba edukasaun pré-eskolar, sei permite ita hadi'a ensinu no prepara ita-nia labarik sira ba dezafius futurus ne'ebé eskola oferese.

Mortalidade bebés no labarik sira ho idade menuse tinan lima iha Timor-Leste mos tuun maka'as, tuun serkade 50% entre 2001 no 2009. Defaktu, no konforme Relatóriu Timor-Leste kona-ba Objetivus Dezenvolvimentu Miléniu 2014, Timor-Leste atinji metas rua iha área, hanesan redusaun mortalidade labarik ho menuse tinan 5 ho mortalidade infantil.

Iha 2014, Timor-Leste hetan louvor husi Organizasaun Mundial Saúde tanba rezultadus ne'ebé hetan iha implementasaun Programa Nasional kona-ba Kontrolu Malária. Redusaun maka'as iha número kazus ne'ebé rejista no fatalidades relaciona ho malária rezulta husi política prevensaun ne'ebé eficiente no mos melloria iha



prosesu diagnóstiku no tratamentu. Ita atinji ona Objetivu Dezenvolvimentu Miléniu ba malária ne'e hatudu katak ita-nia povu mak hanesan sentru husi ita-nia prioridades no asoens.

Malnutrisaun infantil mos rejista katak tuun maka'as. Iha 2001 besik metade (46%) husi labarik sira ho idade menusde tinan lima, sira-nia todan abaixode normal. Hahú husi ne'e rejista ona progresus boot, ho persentajen labarik sira ho pezu ka todan ne'ebé abaixode normal tuun ba 38% iha 2013. Governu liuhusi aumentu produsaun agríkola no enkorajamentu sidadauns atu hadi'a sira-nia dietas alimentares no mos liuhusi programas merendas eskolares, empeñadu maka'as atu altera situasaun.

Tanba ita seidak bele sente laran haksolok ho indikadores nutrisaun iha paíz, Governu asosia ba kampaña "Hamutuk kontra Hamlaha", CPLP nian no ba "Dezafiu Hamlaha Zero", ONU nian, dezeña Planu Asaun Nasional ba Erradikasaun Hamlaha no Malnutrisaun iha Timor-Leste. Objetivu mak atu hadi'a seguransa alimentar no reduz hamlaha iha paíz iha tinan sanulu laran, ka to'o 2025.

Aprovasaun Baze Polítika ba Turizmu, setor estratéjiku ekonomia nasional, agora iha instrumentu esensial ida ba nia dezenvolvimentu. Estabelesimentu sentru formasaun iha turizmu no otelaria ho kuartu sentrus informasaun ne'ebé prevê iha 2015, hanesan parte husi operasionalizasaun polítika ne'e nian iha setor turizmu.

Husi parte seluk, asesu ba eletridade husi parte famílias timornian aumenta mos 22% iha 2007 ba 53% iha 2013.

Nune'e mos, konsumu famílias kona-ba beins no servisu iha Timor-Leste rejista aumentu 36% entre 2008 no 2012.

Ko'alia kona-ba famílias, ha'u tenke temi iha ne'e kona-ba papel fundamental feto sira-nian iha konstrusaun paíz ne'e. Iha famílias laran no iha komidade leet, kada vez mai rekoñese iha ita-nia sosiedade nia kapasidade rejeneradora no transformadora, hodi kontribui ho forma ezemplar ba dezenvolvimentu umanu no ekonómiku Timor-Leste. Governu kontinua empeñadu atu reforma instituisoens, polítikas no foti desizaun kona-ba igualdade jeneru ne'ebé efetiva. Parlamentu Nasional hanesan ezemplu di'ak ida, ne'ebé atualmente 38,5% husi asentus parlamentares feto mak okupa.

Governu mos preokupa ho sustentabilidade ambiental hodi konsidera katak iha ita-nia paíz serkade 90% populasau utiliza ai-maran hanesan fonte enerjia hodi te'in, ne'e mak danifika ka estraga ita-nia ai-leran. Aleinde investimentus ne'ebé ita halo iha tinan hira ne'e laran ba enerjias alternativas, ita fiar katak expansaun rede elétrika foin daudaun ne'e sei reduz maka'as uza ai-maran no konsekuente desflorestasaun.

Tinan 2014 importante ba Timor-Leste tanba ba primeira vez asume prezidênsia rotativa CPLP, iha última simeira Xefes Estadu ho Governu ne'ebé organiza ida Díli, iha Jullu tinan ne'e.

Preparasaun eventus ne'e ezije empeñu, servisu barak no ha'u bele dehan pasiênsia husi timoroan barak. Nu-entantu ha'u hanoin katak benefísius husi esforsu kolektivu ne'e loroloron ita bele haree. Hanesan ezemplu, konstrusaun Ponte CPLP,

infra-estrutura importante tebetebes ne'ebé kontribui ba sirkulasaun ne'ebé fásil no segura iha sidade laran; rekuperasaun jardins no lokais públikus seluk ne'ebé agora sai hanesan fatin hodi promove bein-estar no konvíviu populasaun, rekuperasaun estradas no konstrusaun infra-estruturas saneamentu, intervensoens ne'ebé fundamentais hodi hadi'a kondisoens moris iha kapital.

No, klaru, ita iha kontributu polítiku ne'ebé ita hakarak fó ba CPLP. Fortalesimentu no kresimentu instiuisaun ne'e nian, hanesan promove nia abertura ba setores kooperasaun foun hanesan ekonómiku, halo parte ita-nia agenda ambisioza, no mos apoiu ho akompañamentu ba países iha situasaun vulnerabilidade, hanesan kazu Giné-Bisau, ou iha faze integrasaun, hanesan kazu Giné Ekuatorial. Tanba ne'e Governu propoen atu Dr. José Ramos-Horta hetan nomeasaun hanesan Enviadu Espesial CPLP nian ba países rua ne'e. Proposta Governu nian ne'e ne'ebé submete ona ba aprovasaun Sua Exelênsia Prezidente República, hatudu ita-nia total kompromisu ho objetivus no misaun CPLP nian.

Prezidencia timornian empeñada tebetebes atu impulsiona kooperasaun ekonómika no empresarial iha CPLP, hodi estimula dezvoltimentu projetus empresarais ne'ebé bele reforsa setores privadus nasionais, promosaun parserias ho transferênsia teknolojia ho koñesimentu, hodi tulun hasa'e ekonomias ida-ida nian no garante abertura ne'ebé nesesária ba integrasaun ekonómika rejional iha espasus ne'ebé nia insere ba. Iha 2015, osan serkade **1,5 milloens** dólares sei lori finansia prezidênsia timornian iha CPLP.

Timor-Leste kumpri tiha ona ninia obrigasoens, hanesan membru Nasoens Unidas, wainhira tulun países ne'ebé iha konfliktu ou póz-konfliktu no mos instituisoens frájeis Estadu liu-liu iha prosesu ajendamentu programas ba 'Ajenda dezvoltimentu Nasoens Unidas póz-2015'. Ita atua ho susesu iha grupu 'g7+', ne'ebé ita sei kontinua apoia Sekretariadu, ne'ebé instala iha Díli.

Países barak preziza oportunidade diálogu ba rekonsiliaun diferensas, hodi harii paz, hanesan kondisaun indispensável atu projeta programas dezvoltimentu, ne'ebé benefisia nia sidadauns tomak.

Nune'e mak, ho iniciativa Prezidente República, Taur Matan Ruak, sei harii iha Díli, Sentru Diálogu, Rekonsiliaun no Paz ida. La iha ambisaun ba protagonizmus, Timor-Leste sei kontribui, nu mínimu tuir nia bele, ba paz iha mundu globalizadu ne'e.

Sua Exelênsia  
Señor Prezidente Parlamentu Nasional  
Suas Exelênsias  
Vise-Prezidentes Parlamentu Nasional  
Suas Exelênsias  
Señoras no Señores Deputadus

Orsamentu Jeral Estadu ba 2015 sei fó kontinuidade ba liña atusaun ne'ebé permite hetan progresus ne'ebé temi no rekoñese tiha ona iha nível internasional. Ita tenke mantein konsistênsia iha investimentu prioritáriu iha áreas dezvoltimentu fíziku, umanu no sosial, hodi asegura mos prudênsia ne'ebé preziza hodi permite

sustentabilidade fiskal. Nune'e ami propoen iha orsamentu ne'e kontrasaun despezas korrentes, razaun tansa propoen los de'it aumentu minu neseriu.

Ba mediu prazu infra-estruturas ne'ebé kria daudaun sei kontribui irreversivelmente ba kresimentu ekonómiku, hodi permite aumentu reseitas doméstikas no diminuisaun despezas ba tempu tomak. Tanba razaun ida ne'e ita bele dehan katak levantamentus entre 2015 no 2017, hanesan kondisaun temporária ida, maibé esensial, atu aseguara investimentus boot ne'ebé neserius ba kontinuasaun konstrusaun infra-estruturas krusiais ba paiz, hodi prevê diminuisaun ne'ebé progresiva hahu husi 2018.

**Orsamentu Jeral Estadu ba 2015 mak 1.570 milloens dólares**, portantu aumentu ki'ik ida relasiona ho tinan 2014, hodi garante sustentabilidade fiskal no aseguara katak prokura iha ekonomia konsistente ho inflasaun ne'ebé baixa.

Iha terseiru trimestre 2014 inflasaun ho de'it 0,5%, signifika katak iha média presus ne'e boot liu uitoan de'it kompara ho ne'ebé rejista iha períodu ne'ebé hanesan iha tinan uluk. Atualmente prevê katak inflasaun sei la liu alvu 4 to'o 6%, pelo menus to'o final 2015, no bele inkluzivamente abaixude 4%.

Inflasaun ne'ebé baixa liu signifika katak provávelmente poder kompra sidadauns nian bele aumenta no pobreza diminui. Sei rezulta mos aumentua ki'ik iha kustus ne'ebé empresas sira suporta, ne'ebé sei permite aumenta kompetitividade internacional empresas timornian.

Hein mos katak konsumu famílias bele kontinua aumenta ho forma signifiativa. Ne'e signifika katak famílias barak sei bele aumenta kuantidade beins ne'ebé sira sosa no konsome. Parte husi prinsípiu katak aumentu iha konsumu ne'e sei jeneralizadu, ida ne'e sei rezulta mos redusaun iha pobreza.

Orsamentu ba 2015 konsistente ho kresimentu ekonómiku ne'ebé forte, sustentável ho qualidade aas iha futuru no fahe hanesan tuir mai:

- **184,1 milloens dólares ba Saláriu no Vensimentu**
- **504,7 milloens dólares ba Beins no Servisu** (inklui FDKU)
- **340,3 milloens dólares ba Transferênsias Públikas**
- **36,7 milloens dólares ba Kapital Menor**
- **504,3 milloens dólares ba Kapital no Dezenvolvimentu** (inklui Fundu Infra-estruturas ho emprêstimus)

Total investimentu ba **Fundu Infra-estruturas mak 434 milloens dólares**, inklui emprêstimus no 364 milloens dólares, exklui emprêstimus.

Total dotasaun orsamental ba **Fundu Dezenvolvimentu Kapital Umanu mak 32,1 milloens dólares**, husi ne'e valor 2,1 milloens dólares korresponde ba saldu tranzitadu husi tinan 2014, tuir lei. Programa ida ne'e sei mantein nafatin iha 2015, hodi kontinua ho aposta fundamental atu dezenvolve ita-nia kapital umanu, hodi kapasita ita-nia jovens sira ho formasaun vokasional no téknika ho bolsas estudo ba ensinu superior, atu resalva nu-entantu katak ita hala'o hela avaliasoens neserias hodi garante máximu retornu husi investimentu ne'ebé Estadu halo.

Iha 2015 Orsamentu Jeral Estadu sei finansia ho **170,4 milloens dólares husi reseitas naun petrolíferas estimadas**. Prevê katak reseitas hirak ne'e sei kontinua aumenta iha 2015 no iha médiu-prazu. Taxa kresimentu rejista katak menus liu uitoan kompara ho tinan sira uluk tanba diminuisaun iha reseitas husi fa'an foos, hanesan rezultadu husi aumentu oferta interna produktu ne'e nian.

**Défise fiskal 1.399,6 milloens dólares** sei finansia ho 1.327,5 milloens dólares, husi Fundu Petrolíferu, husi ne'e **638,5 milloens dólares korresponde ho Rendimentu Sustentável Estimadu no 689 milloens dólares ne'ebé aas liu Rendimentu Sustentável Estimadu**. Sei finansira mos ho **70 milloens dólares liuhusi rekursu ba kréditu públiku no 2,1 milloens dólares ho osan**. Levantamentu adisional ne'ebé prevê husi Rendimentu Sustentável Estimadu ne'e moderadu no koerente ho polítika investimentu ne'ebé prevê iha Planu Estratéjiku Dezenvolvimentu ne'ebé Governu implementa daudaun.

Exelênsias

Señoras no señores,

Ba kurtu prazu ita-nia nasaun sei iha pozisaun finanseira ne'ebé metin tebetebes. Iha final terseiru trimestre 2014 saldu husi Fundu Petrolíferu serkade 16,6 mil milloens dólares, no prevê ona katak sei aumenta ba 18,9 mil milloens to'o final 2019.

Saldu atual iha Fundu Petrolíferu boot liu dala sanulu kompara ho montante total ne'ebé Governu hakarak gasta iha 2015. Nune'e klaru ona katak Estadu sei kontinua iha base finanseira ne'ebé sólida ba kurtu no médiu prazu.

Fundu Petrolíferu ne'ebé estabeselese iha 2005 hanesan estratéjia importante ida investimentu nian hodi garante transparênsia ho boa jestaun ba rekursus petrolíferus Timor-Leste nian. Fundu Petrolíferu tanba la tama diretamente ba Orsamentu Estadu, kontribui hodi evita instabilidade makroekonómika, no levantamentos husi Fundu ne'e hatuur ba buat hirak ne'ebé sustentável ba longu prazu no la'ós iha alterasoens ba kurtu prazu reseitas petrolíferas nian.

Wainhira la naran uza reseitas hirak ne'e, ita evita subidas no desidias maka'as iha presus beins, volatilidade iha nível despeza públika, prokura no inflasaun. Ita evita nune'e maldisaun rekursus no opta atu investe iha infra-estruturas bázikas, no iha setores hanesan edukasaun no saúde ne'ebé sustenta dezenvolvimentu ekonómiku paíz nian.

Wainhira iha 2011, ita emenda Lei Fundu Petrolíferu, depoisde prosesu ne'ebé naruk, rigorozu no partisipativu, bele ona aloka to'o 50% iha asoens públikas, pelu-menus 50% iha rendimentus fiksus no labele liu 5% iha instrumentus alternativus. Estratéjia diversifikasaun Fundu Petrolíferu ne'e mai konfirma estratéjia di'ak ida, hodi permite retornu ne'ebé importante no valorozu.

Governu empeñadu mos relasiona ho sustentabilidade fiskal ba longu prazu, liuhusi nia polítika antesipasaun despesas. Polítika ne'e prevê levantamentus ne'ebé liu Rendimentu Sustentável Estimadu ba kurtu prazu atu nune'e bele iha kresimentu ekonómiku, aumentu reseitas doméstikas no diminuisaun despesas ba longu prazu.

Kona-ba taxa ezekusaun orsamental, iha 29 Novembru, Governu rejista ezekusaun orsamental ida ho osan ho valor 1.077 milloens no iha obrigasoens ho 228 milloens. Provável katak maioria obrigasoens ne'e sei rezulta ezekusaun ho osan antesde taka anu finanseiru.

Ne'e signifika katak atu taka anu finanseiru ita sei iha, provavelmente, taxa ezekusaun orsamental ho serkade 87%. Ne'e taxa ezekusaun ida ne'ebé aas tebes, liu-liu konsidera orsamentu 2014 ne'ebé só komesa iha ezequibilidade legal, pratikamente hahú husi terseiru mês korrente anu, ou iha Marsu, no fulan rua ne'ebé uluk liu nian atua tuir rejime duodésimus, no hatudu katak prosesus formulasaun no ezekusaun orsamentu kontina sai di'ak nafatin.

Ami konfia katak introdusaun instrumentus foun fiskalizonaun ho monitorizasaun Programa Governu no Planu Estratéjiku Dezenvolvimentu, ne'ebé estabelese ho Mekanizmu Koordinasaun Polítikas Dezenvolvimentu nian no operacionalizadu liuhusi matrizes PED nian, asegura mos adekuasaun korreta entre buat ne'ebé planeia ho rezultadus prátikus ne'ebé hetan, atu nune'e ita kontinua iha taxas ezekusaun orsamental ne'ebé aas ho rezultadus konkretus no ho impaktu iha iha populasau.

Hanesan imi hatene, instrumentu ida ne'e premite mos planeia ho forma integrada, hodi kruza setores dezenvolvimentu ho forma artikulada, ne'ebé efikaz no eficiente liu aleinde favorese mellor koordinasaun interministerial.

Esforsu koordinasaun ne'e sei permite rezultadus ne'ebé di'ak liu husi setores estratéjikus haat ne'ebé define iha PED. Iha kontextu ne'e, Orsamentu Jeral Estadu ba 2015 refleto setores estratéjikus ne'ebé Governu kompromete, no mos garante objetivus fundamentais haat ne'ebé refere iha leten ona.

### **Orsamentu ba 2015 kumpre política fiskal ne'ebé sustentável**

Iha primeiru lugar, montante total orsamentu mak 1.570 milloens dólares. Ne'e hanesan aumentu ida ne'e ki'ik liu 5% relasiona ho orsamentu 2014 no atudu katak **Governu limita subida jeral despezas**. Ita mos iha orsamentu ba 2015 ne'ebé ki'ik liu 13% relasiona ho orsamentu ba 2012. Ne'e hatudu katak iha tinan hira ne'e laran **Governu tuir hela política fiskal ne'ebé konservadora, hodi ko'a volume orsamentu einvezde aumenta**.

Iha segundu lugar, Governu identifika no **elimina ona despezas deznesesárias no limita subida despezas rekorrentes**. Espesífiku liu, despezas rekorrentes iha orsamentu 2015 mak 1.029 milloens, korresponde ho aumentu ida ho menúsde 4% kompara ho ne'ebé rejista iha orsamentu ba 2014.

Iha terseiru lugar, estimativas kona-ba despezas ba médiu prazu hatudu klaramente padraun antesipasaun. Prevê katak despezas públikas aumenta iha 2016, ba konstrusaun infra-estruturas esensiais, maibé hahú husi ne'e **komesa tuun no**, previzivelmente, levantamentus ne'ebé aas liu RSE sei komesaun hamenus.

Iha kuartu lugar, **reseitas doméstikas rejista kresimentu iha tinan hira ne'e laran**, no hein katak kresimentu ne'e bele mantein ba médiu prazu. Iha 2015 prevê

kobransa reseitas doméstikas ho valor 170 milloens dólares, ne'e hanesan aumentu 62% relasiona ho montante ne'ebé kobra iha 2011. To'o 2019 prevê katak reseitas doméstikas sei ultrapasa maka'as 200 milloens dólares, sai ba dobru husi valor ida ne'ebé rejista iha 2011.

Kona-ba reseitas doméstikas presiza analiza didi'ak realidade no komprende siklu dezenvolvimentu ne'ebé hamosu reseitas ne'e. Reseitas maihusi atividade setor privadu, tanba impostus ne'ebé selu husi kompañias no traballadores ne'ebé kontribui ba aumentu reseitas doméstikas. Nune'e, presiza garante kriaun infra-estruturas ho qualidade no rekursus umanus ne'ebé kapazes no produtivus hodi dada investidores no hametin residu emperezarial paíz nian.

### **Orsamentu ba 2015 konsidera timoroan tomak**

Fornesimentu **enerjia elétrika** iha paíz tomak refleto iha melloria substansial iha timoroan tomak sira-nia moris iha paíz ne'e, aleinde kontribui ho forma inekívoka ba dezenvolvimentu ekonómiku. Indispensável atu kontinua finansia projetu eletrifikasaun, liuhusi akizisaun kombustíveis no manutensaun jeradores elétrikus. Tanba ne'e mak sei investe **115,6 milloens dólares** ba ida ne'e.

Ita sei kontinua investe iha nutrisaun ba ita-nia labarik ho jovens sira, liuhusi programa **merenda eskolar**, hodi hadi'a saúde labarik sira-nian no mos sira-nia rezultadus eskolares. Ho serka-de **17,8 milloens dólares**, iha Ministériu Edukasaun, ita sei finansia programa merendas eskolares iha eskolas públicas no mos fó bolsas estudu.

Iha edukasaun ita sei kontinua apoia universidades, instituisoens salezianas ensinu nian no mos programa merendas eskolares iha eskolas privadas, ho **6,2 milloens**. Enkuantu **UNTL** sei iha **4 milloens**, ba transferênsias públicas, ba bolsas estudu iha instituisoens internacionais, hodi nune'e garante asesu ba universidade ho renome mundial ba estudantes timoroan.

Investimentu importante ida mak **disponibilizsaun medikamentus ho alimentus ba ita-nia pacientes sira** hodi fó serkade **15,3 milloens dólares** ba Ministériu Saúde hadi'a qualidade servisu saúde ne'ebé presta. Sei kona-ba ida ne'e. ho **1,2 milloens dólares**, sei bele hetan ekipamentus médikus, inklui laboratórius no ekipamentus raiu-X ba servisu saúde.

Nune'e mos ho **8,3 milloens**, iha transferênsias públicas, Ministériu Saúde sei kontinua posibilita tratamentu iha estranjeiru ba situasoens emergjênsia ne'ebé la bele rezolve iha paíz no investe ba **klínika kardiovaskular foun ida** no iha atividade apoiu ba saúde pública ho ba kontinuasaun programa **SISKA**.

Programa fundamental ne'ebé hala'o hela no afekta maior parte timoroan sira mak **programa Ita Nia Rai no rejistu kadastral** Ministériu Justisa nian. Ho serkade **14,5 milloens** ita sei servisu ho direitos propriedade ba rai Timor-Leste, hanesan buat ne'ebé sei kontribui mos ba seguransa no kresimentu ekonómiku comunidades nian.

Sei iha setor justisa, no ba prestasaun ne'ebé di'ak liu husi **servisus jurídkus** ba benefísiu sidadauns timoroan tomak, sei investe **20 milloens**. Investimentu ho **1 millaun dólares** ba Ministériu Justisa prosesa **pasaportes biométrikus** sei fasilita mos dezlokasoens sidadauns timoroan iha estranejriu.

Ita sei kontinua mos ho programa **importasaun foos no fa'an produsus lokais** ho **8,5 milloens** ne'ebé aloka iha MCIA, ho objetivu apoia merkadu nasional foos, kontribui ba programas merendas eskolares no prevê asesu báziku ba alimentus ba populasaun tomak, no mos iha situasaun emerjênsia.

**Akizisaun no distribuisaun fini** ba Ministériu Agrikultura no Peskas hodi kontinua apoia dezenvolvimentu agrikultura no hadi'a seguransa nasional, sei kontinua hanesan mos prioridade Governu nian, ho alokasaun **3,7 milloens** dólares. Ministériu ida ne'e sei kontinua apoia **grupus agrikultores** ho **1,4 milloens**, nu'udar promosaun produsaun lokal.

Promosaun demokrasia iha paíz tomak, dezenvolvimentu rural no fortalesimentu comunidades lokais hanesan fatores fundamentais atu kombate dezigualdades sociais iha Timor-Leste. Orsamentu ida ne'e sei atribui **20 milloens dólares**, ba transferênsias públikas, liuhusi Gabinete Primeiru-Ministru, ba apoiu ba **emerjênsia no reabilitasaun eskolas ho klínikas saúde nian**.

Iha mos óptika fundamental kona-ba dezenvolvimentu rural, sei aloka osan **17,8 milloens** ba Ministériu Administrasaun Estatal atu kontinua apoia **PNDS, 1,6 milloens**, ba beins no servisus, atu CNE implementa programa eleisoens **Xefes Suku no 1,5 milloens** ba **eleisaun líderes komunitáriu**s.

MCIA sei kontinua apoia **kooperativas, grupus komersiais, industriais no grupus protesau ambiental** ho finansiamentu ida serkade **4,8 milloens**. Ami inklui mos SEAPRI, **1,5 milloens** ba ita-nia importante sentru bambu no atu apoia **setor privadu iha áreas agrikultura no turizmu**, nu'udar estratéjia ba diversifikasaun akonómika no dezenvolvimentu industrial.

Sei investe mos osan **10,5 milloens** ba programa **empregu rural**, liu-liu ba jovens, no osan **6,5 milloens** ba apoiu artes no desportu liuhusi Sekretaria Estadu Juventude no Desportu.

Ho **1,7 milloens**, iha kapital menor, sei hetan kamioens bombeirus nian no veikulus espesiais seluk ba instituisoens governamentais barabarak, hodi aumenta **seguransa** ba populasoens.

Ho ami-nia empeñu atu koñese di'ak liután ita-nia populasaun hodi serve di'ak liután, ita sei finansia **Sensu 2015**. Estudu ne'e sei fó importantes informasoens kona-ba ema nia níveis moris iha Timor-Leste, ho investimentu **7,5 milloens** ba Sensu ne'e no hodi selu kuotas.

Tanba hatene importânsia servisu transporte **Berlim Nakroma**, ne'ebé ezije investimentu ba kombustível no manutensaun, ita sei kontinua finansia prestasaun servisu ne'e nian ho serkade **1,3 milloens** dólares. Nune'e mos konsidera nesesidade fundamental ida ne'e, Estadu timornian sei aloka **12 milloens dólares** ba Ministériu

Transportes no Komunikasoens atu sosa **ferry** foun ida hodi presta servisu ba populasaun.

No tanba ita-nia rekursus naturais preziosus pertense ba timoroan tomak, ha'u labele haluha dehan katak ita sei kontinua apostu maka'as iha setor ida ne'e, hodi hetan benefisius máximus husi **rikeza soberana ne'e**. Tanba ne'e Ita sei kontinua finansia, liuhusi Ministériu Petróleu no Rekursus Minerais, ANP, Timor GAP ho IPG, ho **11, 5 milloens**, iha transferênsias públikas.

### **Orsamentu ba 2015 investe iha infra-estruturas ho qualidade**

Orsamentu ba 2015 prevê investimentu ida ho 364 milloens dólares hodi hadi'a infra-estruturas iha Timor-Leste. Dezenvolvimentu infra-estruturas sei kontinua sai hanesan prioridade ba Governu, tanba kontribui direktamente ba kresimentu ekonómiku no hadi'a prestasaun servisu.

Presiza infra-estruturas ne'ebé di'ak liu hodi sustenta kresimentu ekonómiku, tanba empresas sira presiza asesu ne'ebé fiável ba bee no eletrisidade hodi aumenta sira-nia produsaun. Empresas sira presiza mos asesu ba infra-estruturas transportes atu lori sira-nia beins ba konsumidores.

Infra-estruturas suporta mos prestasaun servisu públikus. Hanesan ezemplu, iha estradas ho qualidade di'ak bele hadi'a asesu labaraik sira-nian ba eskolas no asesu ema moras sira ba ospitais. Infra-estruturas mos krusiais ba dezenvolvimentu setores ekonómikus komplementares hanesan turizmu no agrikultura. Se la iha estradas ho qualidade, sei la iha possibilidade atu lori produsut ba merkadus nein potencialidade atu atraí ba turizmu.

Estradas iha Timor-Leste iha sei aat nafatin, ne'e mak dezenkoraja investimentu. Tanba ne'e mak Governu iha tinan haat laran sei kontinua implementa programa hodi hadi'a maka'as **rede rodoviária**, ho investimentu serka-de **59,8 milloens** iha 2015.

Ita mos sei investe, iha Fundu Infra-estruturas, **9,8 milloens** ba konstrusaun **pontes**, **19 milloens** ba **aeroportus** no **8,9 milloens** ba dezenvolvimentu **portus**.

Relasiona ho **programa dezenvolvimentu Oecusse**, Governu fiar katak programa ne'e sei enkoraja dezlokasoens indústrias ba Oecusse no tulun dezenvolvimentu ekonómiku no sosial rejiaun ne'e nian. Iha Fundu Infra-estruturas prevê ona investimentu ho **62,5 milloens** ba programa dezenvolvimentu ne'e.

Kona-ba eletrisidade, presiza tan servisu barak iha futuru hodi kontinua hadi'a distribuisaun no transmisaun **eletrisidade** no hadi'a efikasias iha nível fornimentu. Aloka ona ba Fundu Infra-estruturas, **58,1 milloens** dólares ba ida ne'e, liu-liu ba traballus ne'ebé planeia ona kona-ba sistema kontrolu sentral, iluminaun dalan no pontau ida iha Hera.

Relasiona ho **Tasi Mane**, Governu empenhadu atu kontinua dezenvolve indústria petrolífera ho indústrias ne'ebé relasiona ho Kosta Sul, hodi propoen investimentu ida ho **37,6** ba projetu ne'e.



Iha infra-estruturas **edukasaun no saúde**, prevê ona **8 milloens no 4 milloens** ba ida-ida.

Governu aloka mos **34,4 milloens** no FCTL hodi apoia **Programa Dezenvolvimentu Integradu Distrital**, continua ho implementasaun projetus iha nível lokal hanesan konstrusaun obras infra-estruturas ki'ik, ne'ebé aleinde estimula dezenvolvimentu setor privadu, hadi'a maka'as comunidades sira-nia moris.

Investimentu **3 milloens** iha kapital menor, Ministériu Obras Públikas nian sei hodi fornese mos **equipamentus bee nian ho instalsoens eletricidade** iha territóriu tomak. Nune'e mos Ministériu ida ne'e, ho **1,5 milloens** sei apoia **instalasaun painéis solares** iha comunidades ne'ebé la hetan eletricidade, hodi promove uzu enerjias renováveis, enkuantu continua asegura expansaun rede elétrika ba comunidades tomak, mezmú ne'ebé remotas ka dook liu.

Ein-jeral despezas ba infra-estruturas ne'e tenke kontribui ba kresimentu ekonómiku ba longu prazu no hadi'a prestasaun servisu importantes hanesan saúde no edukasaun.

### **Orsamentu ba 2015 proteje timoroan sira ne'ebé presiza no merese liu**

Governu hakarak katak sidadauns hotu-hotu bele hetan benefísius ne'ebé hanesan husi kresimentu ekonómiku, tanba ne'e mak desenvolve ona programas barabarak ho hanoin atu proteje elementus sira ne'ebé iha sosiedade laran presiza no merese liu. Programas hirak ne'e garante katak benefísius husi dezenvolvimentu ekonómiku tenke fahe ba hotu-hotu no labele benefisia los de'it ema lubun oan ida.

Tanba ne'e mak prevê ona atu habelar maka'as programas transferênsias públikas. No, iha kazu ida ne'e, orsamentu Ministériu Solidariedade Sosial nian aumenta husi 147,1 milloens dólares iha 2014 ba 197,2 milloens iha 2015.

Orsamentu ne'e inklui **130,4 milloens** dólares ba **pagamentu pensões ba kombatenetes libertasaun nasional**. Kombatenetes sira ne'e serve sira-nia paíz durante luta ba independênsia ne'e mak importante katak sira mos bele hetan no goza husi prosperidade boot paíz ne'e nian.

Prevê mos ona, **1,8 milloens** dólares, ba beins no servisu, ba Ministériu Solidariedade Sosial hodi investe iha entretenimentu no hanesan kontribuisoens ba **Kombatenetes Libertasaun Nasional**, hodi fó onra ba sakrifísius ne'ebé sei halo ba independênsia Timor-Leste.

Konsidera papel fundamental **Sosiedade Sivil ho Organizasoens naun Governamentais** nian, mak sei atribui ba sira **14 milloens** atu organizasoens hirak ne'e, ne'ebé besik ba comunidades, bele tulun timoroan sira ne'ebé presiza.

Governu estabelese mos dotasaun ida ho **34,9 milloens** dólares ba pagamentu **pensoens ba idozus no inválidus**. Ne'e programa importante ida ne'ebé hodi apoia ema sira ne'ebé ferik no katuas los ona no labele servisu no hodi hamenus maka'as moris-kiak. Nune'e mos programa **Bolsa de Mãe** sei continua sai hanesan prioridade ida hotu hodi apoia grupus ne'ebé vulneráveis liu iha ita-nia sosiedade.

Governu ho osan **2,7 milloens** sei apoia oan-kiak sira, ne'ebé la iha fatin atu hela no defisientes sira no ho **1,2 milloens** apoia programas Kruz Vermella nian no VIH/SIDA, hodi proteje sira ne'ebé vulneráveis liu no prezisa assistênsia médika no merese kuidadu especial husi parte Estadu.

Sua Exelênsia  
Señor Prezidente Parlamentu Nasional  
Suas Exelênsias  
Vise-Prezidentes Parlamentu Nasional  
Suas Exelênsias  
Señoras no Señores Deputados,

Buat ne'ebé ita lalika diskuti maka perkursu ka dalan ne'ebé ita liu ona to'o ohin-loron hatudu klaru katak ita asegura tebes duni objetivu sentral dezvoltimentu nasional.

Paíz ida ne'ebé ema bele moris iha dame no seguransa laran, maski foin hetan independênsia iha tinan sanulu-resin rua laran, ohin-loron fó ba ita hotu kondisoens ne'ebé ita bele aproveita daudaun ona atu bele sai paíz dezvoltidu. Transformasaun ne'e, apresenta dezafius ne'ebé sei la konsege rezolve tomak iha período jersaun mesak ida nian.

Nu entantu ita bele kria kondisoens nesesárias, atu dalan ba oin tenke loos nafatin.

Populasaun ida ne'ebé matenek, saúde di'ak no profesionalmente ativa, administrasaun pública ida ne'ebé profesional no eficiente, setor privadu ida ne'ebé forte no iha kbiit, ho paíz ida ne'ebé iha infra-estruturas básicas ne'e mak hanesan komponentes ne'ebé prezisa atu ita-nia dalan ba dezvoltimentu sustentável bele lori tempu ne'ebé badak.

Investe iha ekonomia naun-petrolífera paíz nian hanesan reseita prinsipal ba susesu. No ida ne'e, señoras no señores, sa'e dauduan ona. Sa'e daudaun tanba diversifikasaun ekonómika iha ita-nia paíz mos komesa sai realidade no sustentabilidade kresimentu ida ne'e nian mos bele asegura.

Ami-nia kompromisu, imi-nia kompromisu, ne'e ba Povu Timor-Leste!

Hamutuk, iha debate ne'ebé ita atu hahú halo, ita bele konstrutivamente supera dezafius no defende buat ne'ebé ita jura atu halo molok atu hahú ezerse ita-nia funsoens – defende interese nasional, proteje povu timor tomak, fó onra ba sakrifisius husi sira ne'ebé mehi ho Timor-Leste ne'ebé livre, soberanu no dezvoltidu.

Obrigadu barak.

Kay Rala Xanana Gusmão  
Díli, 1 Dezembru 2014